

醫
統
正
脈
全
書

五
六

醫元

壘戎

醫壘元戎

江陰朱氏校刊本

元 趙州王好古著

傷寒不可汗不可下不可吐諸證

大發春宜吐夏宜汗秋宜下凡用藥汗及吐下湯劑皆
中病卽止

若少陽病脈微不可發汗亡陽故也宜附子湯

若陽已虛尺中弱濇者復不可下之宜小柴胡湯

若動氣在左在右在上在下並不可發汗宜柴胡桂

枝湯 若少陰病脈細沈數病在裏不可發汗宜當

歸四逆湯 若少陽病不可發汗宜小柴胡湯 若
咽中閉塞咽喉乾燥亡血衄家淋家瘡家不可發汗
已上六證並宜小柴胡湯 若下利清穀不可發汗
宜理中湯四逆湯之類 若四逆厥及虛家皆不可
吐厥者宜當歸四逆湯 虛宜附子湯 有熱人宜
黃耆人參建中湯 若少陰膈上寒乾嘔不可吐宜
小半夏加橘皮湯溫中丸 若咽中有動氣不可下
咽中閉塞不可下宜烏扇湯 若外實者不可下諸
四逆厥者不可下虛家亦然厥宜當歸四逆湯 虛

者宜附子湯 有熱宜黃耆人參建中湯 本虛攻
其熱必噦宜小柴胡湯 若脈浮而緊法當身疼痛
宜以汗解假令尺中遲者不可發汗榮氣不足血少
故也宜小柴胡湯 若脈濡而緊濡則衛氣弱緊則
榮中寒陽微衛中風發熱而惡寒榮緊衛氣冷微嘔
心內煩此不可汗宜小柴胡湯 若濡而弱不可發
汗宜小柴胡湯 若浮而大浮爲氣實大爲血虛小
便當赤而難胞中當虛今反小便利而大汗出法應
衛家微可與小建中湯 若反更實津液四射榮竭

血盡乾煩而不得眠此不可下宜與小柴胡湯 若

脈浮大應發汗宜柴胡桂枝湯 若脈浮而緊者不

可下而反下之爲大逆宜桂枝麻黃各半湯 若脈

數不可下宜柴胡桂枝湯 若下之必煩利不止宜

葛根黃芩黃連湯 若脈濇弱浮數不可下宜小柴

胡湯 若濡弱微濇微則陽氣不足中風汗出而反

躁煩濇則無血厥而且寒不可下宜桂枝甘草牡蠣

龍骨湯 若結胃脈浮大不可下下之卽死宜小陷

胃湯 若陽病多者熱下之則硬宜小柴胡湯 若

太陽發汗不徹轉屬陽明微汗出不惡寒若太陽證
不罷不可下之下之爲逆宜桂枝麻黃湯 若太陽
病有外證未解不可下下之爲逆宜桂枝麻黃湯
若病發於陽而反下之熱入因作結胃病發於陰而
反下之因作痞 結胃則有陷胃湯丸三痞則有瀉
心湯五 若太陽與陽明合病喘而胃滿不可下宜
麻黃杏子甘草石膏湯 若太陽與少陽合病心下
硬頸項強而弦者不可下宜小柴胡湯 若病欲吐
者不可下宜小半夏加橘皮湯 太陰腹痛吐食自

利腹痛下之必胃下結硬 厥陰病渴氣上衝心心
中熱飢不欲食食則吐或下之則利不止 若少陰
病飲食入口則吐心中溫溫欲吐腹痛能吐始得之
手足寒脈弦遲者此胃中寒實不可下也宜溫中湯
生薑汁半夏湯 若無陽陰強大便硬者下之必清
穀腹滿宜用蜜煎導法 若傷寒五六日不結胃腹
濡脈虛復厥者不可下此亡血也宜當歸四逆湯下
之則死宜四逆加人參湯 若藏結無陽證不往來
寒熱其人反靜舌上胎滑者不可攻也謂下也宜用

小柴胡湯 若傷寒嘔多雖有陽明證不可攻之宜

小柴胡湯 若陽明病身面色赤攻之必發熱宜調

胃承氣湯 若色黃者小便不利也宜五苓散 若

陽明病心下硬滿者不可攻之宜生薑瀉心湯 半

夏瀉心湯 攻之利不止者死宜四逆湯

不可汗下吐三法利害非輕前人多列經後大抵醫之

失只在先藥藥之錯則變生若汗下不差則永無亡

陽生黃畜血結胃痞氣及下痢洞泄脇熱痢瘵急勞

等證生矣其如此故錄大禁忌於前使醫者當疾之

初不犯也

太陽證

桂枝一十四方麻黃五方在後保命集內

傷寒六經所感形證合用汗下吐和解等湯九仲景活

人雲岐子保命集載之詳者此不復重錄數書中所

無者并諸方對證加減今載于後

金匱黃耆建中湯 治虛勞裏急諸不足宜此方主之

黃耆

桂枝

生薑

切各三兩

芍藥

六兩

炙甘草

二兩

膠飴

一斤

大棗

十二個

右七味咬咀以水七升先煮六味取三升去滓內膠

飴令消溫服一升日三若嘔者加生薑 若腹滿者
去棗加茯苓四兩 若肺虛損不足痞氣加半夏五
兩

易簡建中加減法

若婦人血疼男子心腹疔痛并四肢拘急疼痛甚者加
遠志半兩 若或吐或瀉狀如霍亂及胃涉濕寒賊
風入腹拘急切痛加附子七錢半 若疝氣發作當
於附子建中湯煎時加蜜一匙頭許 若男子婦人
諸虛不足小腹急痛脇肋臄脹 下虛滿胷中煩悸

面色痿黃唇口乾燥少力身重短氣腰背強痛骨肉
酸疼行動喘乏不能飲食或因勞傷過度或因病後
不復加黃耆一兩半 若婦人一切血氣虛損及產
後勞傷虛羸不足腹中疔痛吸吸少氣小腹拘急痛
引腰背時自汗出不思飲食加當歸一兩名當歸建
中湯產後半月每日三服令人精壯

大建中湯 治內虛裏急少氣手足厥逆少腹攣急或
腹滿弦急不能食起卽微汗出陰縮或腹中寒痛不
堪勞苦唇口舌乾精自出或手足作寒作熱而煩苦

酸痛不能當立此補中益氣

桂心 三錢

芍藥

黃耆 各二錢

甘草 炙

當歸

人參 各一錢

生薑 半兩

附子 五分

半夏 二錢半

棗 二枚

右咬咀水五盞煎至三盞去滓分三服

易簡杏子湯 治欬嗽不問外感風寒內傷生冷及虛

勞咯血痰飲停積悉皆治療

人參

半夏

茯苓

細辛 減半

乾薑 減半

甘草 炙

官桂 減半

芍藥

五味子

右咬咀每服四錢水一盞半杏仁去皮尖剉五枚薑五片煎至六分去滓服

若感冒得之加麻黃等分 若脾胃素實者用粟殼去筋膜碎剉以醋淹炒等分加之每服加烏梅一枚煎服其效尤驗嘔逆惡心者不可用此 若久年欬嗽氣虛喘急去杏仁人參倍加麻黃添芍藥如麻黃之數乾薑五味子各增一半名小青龍湯

大補十全散

參耆朮茯苓 芍地桂歸川 三五錢秤用

生薑棗水煎 婦人虛弱用 名美號十全

治男子婦人諸虛不足五勞七傷不進飲食久病虛損時發潮熱氣攻骨脊拘急疼痛夜夢遺精面色痿黃脚膝無力喘欬中滿脾腎氣弱五心煩悶並皆治之

肉桂 芍藥 甘草 黃耆

當歸 川芎 人參 白朮

茯苓 熟地黃

各等分

右爲麤末每服二大錢水一盞生薑三片棗二枚煎至七分不拘時候溫服桂芍藥甘草小建中湯也黃耆與此三物卽黃耆建中湯也人參茯苓白朮甘草四君子湯也川芎芍藥當歸四物湯也以其氣血俱衰陰陽竝弱天得地之成數故名曰十全散

易簡胃風湯 治大人小兒冷風乘虛入客腸 胃水穀不化泄瀉注下及腸胃濕毒下如荳汁或下瘀血 日夜無度

人參

茯苓

川芎

官桂

當歸

芍藥

白朮

各等分

右咬咀每服二錢水一大盞粟米百餘粒同煎七分去滓稍熱服空心小兒量力減之

若加熟地黃黃耆甘草等分足爲十味名十補湯

若虛勞嗽加五味子 若有痰加半夏 若發熱加

柴胡 若有汗加牡蠣 若虛寒加附子 若寒甚

加乾薑皆依本方等分 若骨蒸發熱飲食自若者

用十補湯加柴胡二兩服之 若氣短加人參 若

小便不利加茯苓 若脈弦澹加川芎 若惡寒加

官桂 若脈濇加當歸 若腹痛加白芍藥 若胃

熱濕盛加白朮 若血瘀色紫者陳血也加熟地黃

若血鮮色紅者新血也加生地黃 若寒熱者加

柴胡 若肌熱者加地骨皮 若脈洪實痛甚者加

酒浸大黃

潔古云防風為上使 黃連為中使 地榆為下使

千里漿一名水葫蘆

木瓜

紫蘇葉

官桂

各半兩

烏梅肉

赤茯苓

各兩

右爲細末煉蜜爲丸如彈子大噙化一丸嚥津

又方

百藥煎

烏梅肉

紫蘇葉

人參

甘草

麥門冬

右各等分爲細末煉蜜丸噙化

荔芩湯

烏梅肉

甘草

各二兩

百藥煎

一兩

白芷

半兩

白檀

三錢

右爲細末湯點

蜜酒

好蜜

二斤

水一碗

細麴

一斤半

好乾酵

三兩

右先熬蜜水去花沫令絕冷下麴酵每日三攪三日

熟

陽明證

葛根湯三方升麻湯大小青龍等湯在後保命集內承氣湯三方亦佳

易老門冬飲子

治老弱虛人大渴

人參

枸杞

白茯苓

甘草

各三錢

五味子

麥門冬

去心各半兩

右為麤末生薑水煎

麥門冬湯治勞復欲死人氣欲絕者用之有效

麥門冬

一兩

甘草

二兩

粳米

半合

右門冬去心爲細末水二盞煎粳米令熟去米約湯
一小盞半入藥五錢七棗二枚去核新竹葉十五片
同煎至一大盞去滓大溫服不能服者綿滴口中

後人治小兒不能灌注者宜用此綿滴法此方不用
石膏以其三焦無大熱也兼自欲死之人陽氣將絕
者故不用石膏若加人參大妙

海藏五飲湯一留飲心下二澀飲脇下三痰飲胃中四

醫方元五
十
溢飲膈上五流飲腸間凡此五飲酒後傷寒飲冷過多故有此疾

旋覆花

人參

陳皮

枳實

白朮

茯苓

厚樸

半夏

澤瀉

猪苓

前胡

桂心

芍藥

甘草

右等分剉每兩分四服水二盞生薑十片同煎至七分取清溫飲無時忌食肉生冷滋味等物因酒有飲加葛根花縮砂仁

海藏已寒丸此丸不僭上陽生於下

治陰證服四逆輩胷中發燥而渴者數日大便秘小便澀赤服此丸上不躁大小便自利

肉桂

茯苓

各半兩

良薑

烏頭

炮各七錢

附子

炮

乾薑

炮

芍藥

茴香

炒各一兩

右等分爲細末糊爲丸桐子大温酒下空腹食前五七十丸八九十丸亦得酒醋爲糊俱可

婦人血風證因大脫血崩漏或前後血因而枯燥其熱不除循衣撮空摸牀閉目不省擲手揚視搖動不寧

錯語失神脈弦浮而虛內燥熱之極也氣麓鼻乾而
不潤上下通燥此為難治宜

生地黄黃連湯主之

川芎

生地黄

當歸

各七錢

赤芍藥

梔子

黃連

黃芩

各三錢

防風

一兩

右為麤末每服三錢水二盞煎至七分取清飲無時
徐徐與之 若脈實者加大黃下之

大承氣湯氣藥也自外而之內者用之 生地黄黃
連湯血藥也自內而之外者用之氣血合病循衣撮

空證同 自氣而之血血而復之氣大承氣湯下之

自血而之氣氣而復之血地黃黃連湯主之也二者俱不

大便

增損理中丸王朝奉云大小陷胷湯丸不愈者宜與之

人參

白朮

括蕒

牡蠣

各二兩

甘草

炒三兩

乾薑

炮一兩半

枳實

炮二十箇

黃芩

去枯一兩

右爲細末煉蜜爲丸如彈子大湯一盞煎服不歇復

與之不過五六胷中豁然矣用藥神速未嘗見也渴

者加括蕒根

汗者加牡蠣

少陽證 大小柴胡湯加減在前附子柴胡五方在後保命集內

易簡參蘇飲 治感冒發熱頭痛與因痰飲凝積發而

為熱竝宜服之若感冒發熱亦如服養胃湯法連進

數服微汗即愈大治中脘痞悶嘔逆惡心開胃進食

小兒室女尤宜服之

前胡 人參 紫蘇 乾葛

半夏 茯苓 加三分 枳殼 陳皮

甘草 桔梗 木香 各半兩

右以咀每服四錢水一盞半生薑七片棗一枚煎至

六分去滓不以時候素有痰飲者俟退熱以二陳湯
或六君子湯間服若男子婦人虛勞發熱或吐衄下
血過多致虛熱者用此藥三兩加四物湯二兩合和
名茯苓補心湯

活人治婦人傷寒妊娠服藥例

若發熱惡寒者不離桂枝芍藥 若往來寒熱者不
離柴胡前胡 若大渴者不離知母石膏五味子麥
門冬 若大便泄者不離桂附白朮乾薑 若大便
燥結者不離大黃黃芩 若經水適來適去斷者不

醫聖方
離小柴胡 若安胎者不離人參阿膠白朮黃芩

若發汗者不離蔥豉生薑麻黃旋覆 若頭痛者不

離前胡石膏梔子 若傷暑頭痛者不離柴胡石膏

甘草 若滿悶者不離枳實陳皮 若胎氣不安者

不離黃芩麥門冬人參 若瘧發黑者不離黃芩梔

子升麻

萬病紫苑丸 療臍腹久患疰癖如碗大及諸黃病每

地氣起時上氣衝心遶臍絞痛一切蟲咬十種水病

十種蠱病反胃吐食嘔逆惡心飲食不消天行時病

婦人多年月露不通或腹如懷孕多血天陰即發又
治十二種風頑痺不知年歲晝夜不安夢與鬼交頭
白多屑或哭或笑如鬼魅所着腹中生瘡腹痛服之
皆效

紫苑

去苗土

吳茱萸

湯洗七次焙乾

菖蒲

柴胡

去鬚

厚樸

薑製一兩

桔梗

去蘆

茯苓

去皮

皂莢

去皮子等炙

桂枝

乾薑

炮

黃連

去鬚八錢

蜀椒

去目及閉口微炒去汗

巴豆

去皮膜出油研

人參

去蘆各半

兩

川烏

去皮及臍三錢

加羌活

獨活

防風

各半兩

右爲細末入巴荳勻煉蜜爲丸如桐子大每服三丸
漸加至五七丸生薑湯送下食後臨蓐初有孕者不
宜服具引于後

痔漏腸風酒下 赤白痢訶子湯下 膿血痢米飲

湯下 墮傷血悶四肢不收酒下 蛔蟲咬心檳榔

湯下 氣噎憂噎荷葉湯下 打撲傷損酒下 中

毒蒂灰甘草湯下 一切風升麻湯下 寸白蟲檳

榔湯下 霍亂乾薑湯下 欬嗽杏仁湯下 腰腎

痛荳淋湯下 陰毒傷寒温酒下 吐逆生薑湯下

食飲氣塊麩湯下 時氣井花水下 脾風陳皮

湯下 頭痛水下 心痛温酒下 大小便不通燈

草湯下 因物所傷以本物湯下 吐水藜湯下

氣病乾薑湯下 小兒天風弔搐防風湯下防已亦

可 小兒疳痢蔥白湯下 小兒乳食傷白湯下

月信不通煎紅花酒下 婦人腹痛川芎湯下 懷

孕半年後胎漏艾湯下 有子氣衝心酒下 產暈

痛温酒下 血氣痛當歸酒下 產後心腹脹滿荳

淋湯下 難產益志湯下 產後血痢當歸湯下

赤白帶下酒煎艾湯下 解內外傷寒粥飲下 室

女血氣不通酒下 子死菜子湯下 又治小兒驚

癩大人癲狂一切風及無孕婦人身上頑麻狀如蟲

行四肢俱腫呻吟等疾

太陰證 陷胷三方瀉心五方在後保命集內

理中湯加減例

若為寒氣濕氣所中者加附子一兩名附子理中湯

若霍亂吐瀉者加橘紅青橘各一兩名治中湯

若乾霍亂心腹作痛先以鹽湯少許頓服候吐出令
透卽進此藥 若嘔吐者於治中湯內加丁香半夏
一兩每服生薑十片同煎 若泄瀉者加橘紅茯苓
各一兩名補中湯 若溏泄不已者於補中湯內加
附子一兩不喜飲水穀不化者再加縮砂仁一兩共
成八味 若霍亂吐下心腹作痛手足逆冷於本方
中去白朮加熟附名四順湯 若傷寒結胃先以桔
梗枳殼等分煎服不愈者及諸吐利後胃痞欲絕心
脘高起急痛手不可近者加枳實茯苓各一兩名枳

實理中湯 若渴者再於枳實理中湯內加栝萸根

一兩 若霍亂後轉筋者理中湯內加火煨石膏一

兩 若臍上築者腎氣動也去朮加官桂一兩半腎

惡燥故去朮恐作奔豚故加官桂 若悸多者加茯

苓一兩 若渴欲飲水者添加朮半兩 若苦寒者

添加乾薑半兩 若腹滿者去白朮加附子一兩

若飲酒過多及啖炙燔熱食發爲鼻衄加川芎一兩

若傷胃吐血以此藥能理中脘分利陰陽安定血

脈只用本方 若中附子毒者亦用本方或止用甘

草乾薑等分煎服仍以烏荳煎湯解之

平胃散加減例

若瀉脾濕加茯苓丁香白朮爲調胃散一法加藿香
半夏 若加乾薑爲厚樸湯 若溫疫時氣二毒傷

寒頭痛壯熱加連鬚蔥白五寸荳豉三十粒煎三二
服微汗出愈 若五勞七傷腳手心熱煩躁不安百

節酸疼加柴胡 若痰嗽瘧疾加薑製半夏 若本

藏氣痛加茴香 若水氣衝滿加桑白皮 若婦人

赤白帶下加黃耆 若酒傷加丁香 若飲冷傷食

加高良姜 若滑脫泄瀉加肉荳蔻 若風痰四肢
沈困加荆芥 若腿膝冷痛加牛膝 若渾身虛壅
拘急加地皮骨 若腿膝濕痺加兔絲子 若白痢
加吳茱萸 若赤痢加黃連 若頭風加藁本 若
轉筋霍亂加楠木皮 若七邪六極耳鳴夢洩盜汗
四肢沉重腿膝酸痿婦人宮藏久冷月脈不調者加
肉桂 若胃寒嘔吐多加生薑 一法加茯苓丁香
各三兩共成六味 若氣不舒快中脘痞塞加縮砂
仁香附子各三兩生薑煎服 若與五苓散相半爲

對金飲子 若與六一散相合爲黃白散 若與錢

氏異功散相合爲調胃散 若欲進食加神麴麥芽

吳茱萸蜀椒乾薑桂爲吳茱萸湯 若加藁本桔梗

爲和解散治傷寒吐利 若加藿香半夏爲不換金

正氣散 若瘧疾寒熱者加柴胡 若小腸氣痛者

加苦練茴香

少陰證

真武四逆等湯在活人姜
附方七道在保命集內

八物定志丸補益心神安定魂魄治痰去胷中邪熱理

肺腎

人參 二兩半

菖蒲

遠志 去心

茯神 去心

茯苓 去皮各一兩

硃砂 一錢

白朮

麥門冬 去心

各半兩

牛黃 二錢另細研

右為細末煉蜜丸桐子大米飲湯下三十九無時

若髓竭不足加生地黃

當歸

若肺氣不足加天門冬

麥門冬

五味子

若心氣不足加上黨參

茯神

菖蒲

若脾氣不足加白朮

白芍藥

益志

若肝氣不足加天麻

川芎

若腎氣不足加熟地黃

遠志

牡丹皮

若膽氣不足加細辛

酸棗仁

地榆

若神昏不足加硃砂

預知子

茯神

仲景八味丸

熟地黃補腎水真血

肉桂補腎水真火

牡丹皮補神志不足

附子能行諸經而不止

兼益火 白茯苓能伐腎邪濕滯

澤瀉去胞中

留垢及遺溺

山茱萸治精滑不禁

乾山藥能

治皮毛中燥酸澀

右八味皆君主之藥 若不依易老加減服之終不
得效若加五味子為腎氣丸述類象形之劑也益火
之源以消陰翳壯水之主以制陽光錢氏地黃丸減

桂附

潔古老人天麻丸 治證見活法機要

天麻 六兩酒浸三日焙乾秤 除風痺

牛膝 六兩酒浸三日焙乾秤 強筋

玄參 六兩 樞機管領

草薺 六兩另為末 壯骨

杜仲七兩剉炒去絲 使筋骨相着

當歸十兩全用 和養血

羌活十兩或十五兩 去骨節間風

生地黄一斤 益真血

附子一兩炮 行諸經不止

獨活五兩 去腎間風邪

右為細末煉蜜為丸如桐子大每服五七十九病大至百丸空心食前溫酒白湯下服藥忌壅塞宜於通利故服半月稍覺壅塞微以七宣丸輕疎之使藥再

醫方彙元五
二
爲用也

大效牡丹皮散 治血藏虛風及頭目不利不思飲食

手足煩熱肢節拘急疼痛胃膈不利大腸不調陰陽

相干心驚忪悸或時旋運

牡丹皮

川芎

枳殼

炒各一兩

陳皮

炙

玄胡

甘草

羌活

半夏

湯洗

三稜

炮

乾薑

炮

肉桂

各半兩

木香

訶子肉

白朮

炒各三分

芍藥

三錢

當歸

一兩半

右爲細末每服二錢水一盞半煎五七沸食前温服

益血海退血風勞攻注消寒痰實脾胃理血氣攻刺
及氣虛惡寒潮熱證至妙

海藏大五補丸同三才丸例

天門冬

麥門冬

菖蒲

茯神

人參

益智

枸杞

地骨皮

遠志

熟地黃

右爲末煉蜜爲丸如桐子大空心酒下三十丸本方
數服以七宣丸泄之

清心丸治熱

黃蘗二兩 生

天門冬一兩 生

黃連半兩

龍腦一錢

麥門冬一兩 去心

右為細末煉蜜丸桐子大每服十丸臨卧門冬酒下

薄荷湯亦得

火府丹丙丁俱瀉

黃芩一

黃連一

生地黄二

木通三

右為細末煉蜜丸桐子大每服二三十九溫水下臨

卧

海藏調胃白朮澤瀉散 治痰病化為水氣傳變水鼓

不能食

白朮

澤瀉

芍藥

陳皮

茯苓

生薑

木香

檳榔

右為末一法加白朮本藥各半治腹臍上腫如神

若心下痞者加枳實 若下盛者加牽牛

厥陰證

當歸四逆并加吳茱萸等湯是陰證畧例

四物湯益榮衛滋氣血月水不調臍腹疔痛等證並見

局方

熟地黃

補血如臍下痛非此不能除乃通於腎經之藥也

川芎

治風泄肝木也如血虛頭痛非此不能除乃通肝經之藥也

芍藥

和血理脾如腹中虛痛非此不能除乃通脾經之藥也

當歸

和血如血刺痛非此不能除刺如刀刺乃通腎經之藥也

右為麤末水煎

加減於後

若加地骨皮牡丹皮治婦人骨蒸

若妊娠胎動不安下血不止者加艾十葉阿膠一片

又加蔥白黃耆

若血藏虛冷崩中去血過多亦加膠艾

若婦人嘗服春倍川芎

脈弦頭痛

夏倍芍藥

脈洪飧泄 秋倍地黃 脈沉瀉血虛 冬倍當歸

脈沉寒而不食

若春則防風四物加防風倍川芎

若夏則黃芩四物加黃芩倍芍藥

若秋則門冬四物加天門冬倍地黃

若冬則桂枝四物加桂枝倍當歸

若血虛而腹痛微汗而惡風四物湯加茂桂謂之腹痛六合湯

若風眩運加秦艽羌活謂之風六合

醫方類聚卷之五
三
若氣虛弱起則無力暈然而倒加厚樸陳皮謂之氣六合湯

若發熱而煩不能睡卧者加黃連梔子謂之熱六合
若虛寒脈微自汗氣難布息清便自調加乾薑附子
謂之寒六合湯

若中濕身沉重無力身涼微汗加白朮茯苓謂之濕六合湯

若產後虛勞日久而脈浮疾宜

柴胡四物湯

川芎

熟地黃

當歸

芍藥

各一兩半

加柴胡

八錢

人參

黃芩

甘草

半夏

各三錢

水煎服

若婦人筋骨肢節痛及頭痛脈弦增寒如瘧宜治風

六合湯

四物湯

四兩

防風

羌活

各一兩

若血氣上衝心腹肋下滿悶宜治氣六合

四物湯

四兩

木香

檳榔

各一兩

若臍下虛冷腹痛及腰脊間悶痛宜立胡六合小腹

痛者同

四物湯

四兩

玄胡

苦練

各一兩
碎炒焦

若氣充經脈故月事頻併臍下多痛宜芍藥六合湯

四物湯

四兩

芍藥

一兩

若經事欲行臍腹絞痛臨經痛者血澁也宜

八物湯

四物湯

四兩

玄胡

苦練

碎炒
焦

檳榔

木香

各一兩

若經水過多別無餘證宜黃芩六合湯

四物湯四兩

黃芩

白朮各一兩

若經水澀少宜四物內加葵花煎

又加紅花
血見愁

若虛勞氣弱欬嗽喘滿宜厚樸六合湯

四物湯

四兩

厚樸

姜製一兩

枳實

麩炒半兩

若經水暴下加黃芩一兩

若腹痛者加黃連如夏

月不去黃芩

若經水如黑豈汁者加黃芩黃連各

一兩 若經水少而色和者四物湯加熟地黃當歸

各一兩 若經水適來適斷或有往來寒熱者先服

小柴胡湯以去其寒熱後以四物湯和之 若婦人

血積者四物湯內加

廣茂

京三稜

桂枝

乾漆

各一兩

若婦人傷寒汗下後飲食減少血虛者宜

八物湯

四物湯

四兩

黃耆

甘草

茯苓

白朮

各一兩

若妊娠傷寒中風表虛自汗頭痛項強身熱惡寒脈浮而弱太陽經病宜表虛六合湯

四物湯

四兩

桂枝

地骨皮

各七錢

若妊娠傷寒頭痛身熱無汗脈浮緊太陽經病宜表
實六合湯

四物湯

四兩

麻黃

細辛

各半兩

若妊娠傷寒中風濕之氣肢節煩疼脈浮而熱頭痛
宜風濕六合湯太陽標病也

四物湯

四兩

防風

蒼朮

製各七錢

若妊娠傷寒下後過經不愈溫毒發癍如錦文宜升

麻六合湯

四物湯

四兩

升麻

連翹

各七錢

若妊娠傷寒脅滿痛而脈弦少陽也宜柴胡六合

湯

四物湯四兩

柴胡

黃芩各七錢

若妊娠傷寒大便硬小便赤氣滿而脈沉數陽明太

陽本病也急下之宜大黃六合湯

四物湯四兩

大黃半兩

桃仁十箇去皮尖麩炒

若妊娠傷寒汗下後欬嗽不止者宜人參六合湯

四物湯四兩

人參

五味子各五錢

若妊娠傷寒汗下後虛痞脹滿者陽明本虛也宜厚

樸六合湯

四物湯

四兩

厚樸

枳實

各半 炒

若妊娠傷寒汗下後不得眠者宜梔子六合湯

四物湯

四兩

梔子

黃芩

各半兩

若妊娠傷寒身熱大渴蒸蒸而煩脈長而大者宜石

膏六合湯

四物湯

四兩

石膏

知母

各半兩

若妊娠傷寒小便不利大陽本病宜茯苓六合湯

四物湯

四兩

茯苓

澤瀉

各半兩

若妊娠傷寒太陽本病小便赤如血狀者宜琥珀六

合湯

四物湯

四兩

琥珀

茯苓

各半兩

若妊娠傷寒汗下後血漏不止胎氣損者宜膠艾六

合湯

四物湯

四兩

阿膠

艾

各半兩一方加甘草同上一方加乾薑甘

草黃者

若妊娠傷寒四肢拘急身涼微汗腹中痛脈沉而遲

少陰病也宜附子六合湯

四物湯

四兩

附子

炮去皮臍

肉桂

各半兩

若赤白帶下宜香桂六合湯

四物湯

四兩

肉桂

香附子

各半兩

若妊娠傷寒畜血證不宜墮胎藥下之宜四物大黃湯下

四物湯

生地黃

酒浸大黃

若虛熱病四物與參蘇飲相合名補心湯主之

若四肢腫痛不能舉動四物蒼朮各半湯主之

若治燥結四物與調胃承氣湯各半為玉燭散

若流濕潤燥宜四物理中各半湯

若保胎氣令人有子四物與縮砂四君子湯各半名

八珍湯

若熱與血相搏口舌乾渴飲水加

栝蘘

麥門冬

若腹中刺痛惡物不下加

當歸

芍藥

若血崩者加

生地黃

蒲黃

黃芩

若頭昏項强者加

柴胡

黃芩

若因熱生風者加

川芎

柴胡

防風

若藏秘澀者加

大黃

桃仁

若滑濇者加

官桂

附子

若嘔者加

白朮

人參

生薑

若大渴者加

知母

石膏

若發寒熱者加

乾生薑

丹皮

芍藥

柴胡

若水停心下微吐逆者加

猪苓

茯苓

防己

若虛寒似傷寒者加

人參

柴胡

防風

若產婦諸證各隨六經以四物與仲景藥各半服之
其效如神

若婦人或因傷酒或因產亡血或虛勞五心煩熱者

宜四物二連湯

四物湯

內生用
地黃

黃連

胡黃連

真者

溫飲清汁

四物與桂枝麻黃白虎柴胡理中四逆茱萸承氣涼
膈等皆可作各半湯此易老用藥大略也

若虛煩不得睡加竹葉

人參

若婦人血虛心腹疔痛不可忍者去地黃加乾薑名

四神湯

若諸痛有濕者四物與白朮相半加

天麻

茯苓

川山甲

酒煎

若目赤暴發作雲翳疼痛不可忍宜

四物龍膽湯

四物各半兩

羌活

防風各三錢

草龍膽

防已各二錢水煎

海藏云婦人妊娠畜血

婦人妊娠或畜血

抵當桃仁勿妄施

要教子母俱無損

大黃四物對服之

海藏當歸丸

治三陰受邪心臍少腹疔痛氣風等證

四物湯

各半兩

防風

獨活

全蝎

各半兩

茴香

炒

續斷

各一兩

苦練

玄胡

各七錢

木香

丁香

各二錢半

右為細末酒糊丸桐子大空心温酒下三五十九大

效

苦練丸

治奔豚小腹痛神效

川苦練

茴香

附子

一兩炮
去皮臍

右三味酒二升煮盡為度焙乾細末之每秤藥末一
兩入玄胡半兩全蝎十八箇炒丁香十八箇別為末
和勻酒糊丸桐子大溫酒下五十丸空心痛甚加當
歸煎服

治喉閉遠巡不救方

皂莢

去皮子生半兩為細末筋頭點少許在痛處
更以醋糊調藥末厚塗項上須臾便破血出

立
差

拯濟換骨丹

海云自汗者不宜服

歌曰

槐皮芎朮芷 仙人防首蔓 十味各停勻

苦味香減半 龍麝即少許 朱砂作衣纏

麻黃膏煎丸 大小如指彈

右治半身不遂口眼喎斜手足不仁言語蹇澀或痛入骨髓或痺襲皮膚或中急風涎潮不言精神昏塞行步艱難筋脈拘急左癱右瘓一切風疾並皆治之

槐莢子生 人參 桑白皮 蒼朮

川芎 何首烏 蔓荊子 歲薑仙

防風各二兩 五味子 香附子 苦參各一兩

香白芷

二兩

麝香

二錢
另研

右一十四味爲細末入香令勻又用麻黃十斤去節
根用大河水三石三斗熬至六斗瀘過去滓再熬至
二升半入銀石器內熬成膏入前藥末和勻杵三五
千下每一兩作十丸硃砂爲衣每服一丸先搗碎酒
一盞自晨浸至晚食後臨卧攪勻服之神清無睡是
藥之驗須更隔五日服之如中風無汗宜服若體虛
自汗服之是重亡津液也若風盛人於蜜室溫卧取

汗

三焦熱用藥大例

方在元戎

上焦

清神散

連翹防風湯

涼膈散

龍腦飲子

犀角地黃湯

中焦

小承氣湯

調胃承氣湯

洗心散

四順清涼飲

桃仁承氣湯

下焦

大承氣湯

五苓散

八正散

石膏散

抵當湯丸

柴胡飲子

清涼飲子

氣分熱

血分熱

白虎湯

桃仁承氣湯

三黃丸

通治大熱

黃連解毒湯

三焦寒用藥大例

方在衛生

上焦

桂附丸

鐵刷湯

胡椒理中丸

中焦

二氣丸

附子理中丸 大建中

下焦

還少丹

八味丸

大真丹

桂枝加附子湯

巴戟丸

氣分寒

桂枝加芍藥

血分寒

人參新加湯

神珠丹

大已寒丸

通治大寒

四逆湯

右此內有寒熱之大略也若外有寒熱者當求別法

發痲諸藥

葛根橘皮湯痲在肌治傷寒暴發肌中痲爛欬而心

悶但嘔清汁宜此

葛根

橘皮

杏仁

知母

黃芩

麻黃

甘草

右等分剉每用五錢水煎

陽毒升麻湯癍在面 治傷寒一二日或吐下後變成
陽毒腰痛煩悶不安面赤狂言見鬼下痢脈浮大
數咽喉痛下膿血五日可治七日難愈

升麻

半兩

犀角

射干

黃芩

人參

甘草

各二錢半

右以咀水三升煎取半飲一盞刻許再服溫覆手足
汗出解否則重作

陽毒玄參升麻湯癍在身 治汗下吐後毒不散表虛
裏實熱發於外甚則煩燥 讖語兼治喉痺腫痛

玄參

升麻

甘草 各半分

右細剉水煎

陽毒梔子湯少陽陽明合病

治陽毒傷寒壯熱百節疼痛

升麻

梔子仁

黃芩

芍藥

石膏

知母

甘草

杏仁

柴胡

右麤末五錢生薑五片豉百粒水煎

消毒犀角飲子治癩

牛旁子六兩

荆芥三兩

防風三兩

甘草一兩

右水煎服

陰毒升麻鱉甲湯陰癰 大建中湯尤妙

升麻三兩

當歸

甘草各二兩

蜀椒一兩 去汗

鱉甲炙

雄黃半兩 研

右為末每服半兩水煎

蒸病 治者宜隨各經虛實內外淺深用藥加減可也

古今錄驗五蒸湯

甘草二兩 炙

茯苓三兩

人參二兩

竹葉二兩

乾地黄

葛根

各三兩

知母

黄芩

各二兩

石膏

五兩碎

粳米

二合

右十味咬咀以水九升煮取二升半分爲三服亦可

以先炙小麥水乃煮藥 忌海藻菘菜蕪荂大醋

實熱

黄芩

黄連

黄蘗

大黃

虛熱

氣也

烏梅

秦艽

柴胡

血也

青蒿

鱉甲

蛤蚧

小麥

牡丹皮

肺 鼻乾

烏梅

天門冬

麥門冬

紫苑

皮 舌白唾血石膏

桑白皮

膚 昏昧嗜睡牡丹皮

氣 遍身氣熱喘促鼻乾

人參

黃芩

梔子

大腸 鼻右孔乾痛

大黃

芒硝

脈 唾白浪語脈絡溢脈緩急不調

生地黃

當歸

心 舌乾

黃連

生地黃

血 髮焦

地黃

當歸

桂心

童子小便

小腸 下唇焦赤 茯苓

木通

生地黃

脾 唇焦

芍藥

木瓜

苦參

肉 食無味而嘔煩燥不安

芍藥

胃 舌下痛

石膏

粳米

大黃

芒硝

葛根

肝 眼黑

川芎

當歸

前胡

筋 甲焦

川芎

當歸

膽 眼白失色

柴胡

栝蘘

三焦 乍熱乍寒

石膏

竹葉

腎 兩耳焦

生地黃

石膏

知母

寒水石

腦 頭眩悶熱地黃

防風

羌活

髓 髓沸骨中熱

天門冬

當歸

地黃

骨 齒黑腰痛足逆變疔食減

鱉甲

地骨皮

牡丹皮

當歸

生地黄

肉 肢細跖腫府藏俱熱

石膏

黃蘗

胞 小便赤黃

澤瀉

茯苓

生地黄

沉香

滑石

膀胱 左耳焦

澤瀉

茯苓

滑石

凡此諸蒸皆熱病後食肉油膩房酒犯之而成久蒸不餘變成疔病即死矣

葛根散治陽毒身熱如火頭痛躁渴咽喉乾痛

葛根

剉七錢半

黃芩

大黃

醋炒

甘草

山梔子仁

樸硝

各半兩

右為末水煎

活人敗毒散太陽證 治傷風溫疫風溫風眩風痰痺

溫

羌活

獨活

前胡

柴胡

枳殼

人參

茯苓

桔梗

甘草

川芎

分兩隨病加減

右細末生薑水煎或沸湯點亦可大人小兒皆宜瘴

烟之地温疫時行或人多風痰或處卑濕腳氣此藥不可闕一方少加薄荷同煎

三陽頭痛

羌活

防風

荆芥

升麻

葛根

白芷

柴胡

川芎

芍藥

細辛

蔥白連鬚

分兩旋加

若陰證頭痛只用温中藥足矣乃理中薑附之類也

發黃兼諸雜證

治法在前難知內附陰黃治法在後陰證畧例附

小便不利煩燥而渴

加茯苓猪苓滑石當歸官桂

煩燥喘嘔不渴 加陳皮白朮半夏生薑茯苓

四肢遍身冷者 加附子甘草

茵陳蒿湯加減

肢體逆冷腰上自汗 加附子乾薑甘草

身冷汗不止者 加附子乾薑

前藥末已脈尚伏 加吳茱萸附子乾薑木通當

歸

韓氏立名為茵陳茯苓湯 茵陳橘皮湯

小茵陳湯 茵陳四逆湯 茵陳附子湯

茵陳茱萸湯 大抵只是仲景陰證藥內加茵陳
也用者要當識之

掌中金丸 治婦人乾血氣

川山甲 炮 甘草 苦丁香 川椒

苦葶藶 白附子 草烏頭 猪牙皂角

各三錢 巴豆 一錢全用研

右通為細末生葱絞汁和丸彈子大每用一丸新綿
包定內陰中一日即白二日即赤三日即血神效

龍腦雞蘇丸 上焦熱

除煩解勞去肺熱欬衄心熱驚悸脾胃熱口甘吐血
肝膽熱泣出口苦腎熱神志不定上而酒毒鬲熱消
渴下而血滯五淋血崩等疾

薄荷

一斤

麥門冬

去心三兩

甘草

一斤半

生乾地黄

六兩各為末

黃耆

新蒲黃

阿膠炒

黃連

人參

木通

各一兩

柴胡

二兩剉同木通沸湯半升浸一日夜絞取汁

右為細末好蜜二斤先煉一二沸然後下生地黃末
不住手攪時加木通柴胡汁浸熬成膏勿令火緊焦

了然後將前藥末和丸如豌豆大每服二十九白湯下

虛勞煩熱梔子湯下 肺熱黃芩湯下 心熱悸動

恍惚人參湯下 唾咯吐衄四血去心麥門冬湯下

脾胃熱赤芍藥生甘草湯下 肝熱防風湯下

腎熱黃柏湯下 治五淋及婦人漏下車前子湯下

痰嗽者生薑湯下 莖中痛者蒲黃滑石末一錢

調下 氣逆者橘皮湯下 室女虛勞寒熱潮作煎

柴胡人參湯下 已上並食後臨臥服

黃耆膏子煎丸治證同煎

人參

白朮

各一兩半

柴胡

黃芩

各一兩

白芷

知母

甘草

各半兩

鱉甲

一筒半手

大者醋炙

右為細末黃耆膏子丸桐子大每服三五丸百沸

湯下空心右用黃耆半斤麤末水二斗熬一斗去滓

再熬令不住攪成膏至半斤入白蜜一兩錫一兩再

熬令蜜錫熟得膏十兩放令丸藥

地骨皮枳殼散 治骨蒸壯熱肌肉消瘦少力多困夜

多盜汗

地骨皮

秦艽

柴胡

枳殼

知母

當歸

鱉甲
醋炙黃

右等分爲末水一盞桃柳枝頭各七箇薑三片烏梅

一箇每服去滓臨卧服

易簡芎歸湯 治一切去血過多眩暈悶絕傷膽去血

產後去血崩中去血拔牙去血金瘡去血不止者舉

頭欲倒悉能治之

芎藭

當歸
各等分

右咬咀水煎熱服

若產後眩暈加芍藥 產後腹疼不可忍加官桂酒
童便合煎 妊娠子死或不死胎動酒水合煎卽下
未死者卽安 若虛損腹痛少氣頭眩自汗每服加
羊肉一兩生薑十片水煎 若臨月服之則縮胎易
產 若室女婦人心腹疴痛經脈不調水煎服 若
妊娠胎氣不安產後諸疾酒煎服 若難生倒橫子
死腹中先用黑薑一大合炒熟水與小便合煎服
若難產用百草霜香白芷等分童子小便好醋各一

合沸湯浸服甚者再服已分娩矣 若腸風藏毒每
服加槐花末半錢三日取下血塊即愈 若吐血亦
宜服此 若血氣上喘下腫空心煎艾湯調下 若
產後惡血注心迷悶喘急腹痛依前用黑荳加生薑
自然汁煎服 若產後頭痛加荆芥 若崩中漏下
失血不止加香附子炒每兩入甘草一錢沸湯點服
若有白帶者加芍藥半兩乾薑等分米飲調下

三奇六神麴法

白虎白麴一百斤 青龍青蒿自然汁三升

勾陳蒼耳汁二升 騰蛇野蓼子汁四升

玄武杏仁四升

去皮尖看麩
乾濕用水

朱雀赤小豈三升

煮軟去
湯研

右一處拌勻稍乾爲妙用大盆罨一宿子伏內至寅
日踏極實爲度甲寅戊寅庚寅乃三奇也卧鋪如麴
法

千金種子法進火之時當至陰節間而止不爾則過一
宮矣予問故師曰深則少陰之分肅殺之方何以生
化淺則厥陰之分融和之方故能發生所以受胎之

處在淺而不在深也非月經後皆不可用事惟經後
一日男二日女三日男此之外皆不成胎大風大雨
大寒大暑陰晦日月蝕皆不可交接所生男女痴聾
瘖瘂四體不完矣

搐鼻香 治子宮久冷赤白帶下

牡蠣

煨

紫稍花

韶腦

母丁香

黃狗頭骨

煨

蛇牀子

破故紙

桂心

各等分

右爲細末煉蜜丸如雞頭大臨事用一粒

醫壘元戎終